

Ilanngussaḡ D



INATSIARTUT

Aningaasaqarnermut Akileraartarnermullu
Ataatsimiititaliap Siulittaasua, Jens Immanuelson
Postbox 1060
3900 Nuuk

Ulloq: 13.10.2015
J.nr.: 01.37.02.29-00019

Aningaasaqarnermut Akileraartarnermullu Ataatsimiititaliap AIS 2016-imik misissuineranut Eqqissimatitsineranut Avatangiisinullu Ataatsimiititaliap ilanngussassai.

Suliassaqarfimmut ataatsimiititaliaq AIS 2016-imut imatut oqaaseqaatissaqarpoq ilanngussassaqaarlunilu.

Inatsisartunut ilaasortap Anthon Frederiksenip (PN) § 37, tunngavigalugu apeqquteqaataanut akissuteqaammi ulloq 20. august 2015-imeersumi eqqaaneqartoq nukissiornermi kissaq sinneruttoq atorluarneqanngitsoq pillugu Naalakkersuisut qanoq pilersaaruteqarnersut Eqqissimatitsineranut Avatangiisinullu Ataatsimiititaliamit erseqqinnerusumik paasisaqarfigerusunneqarpoq. (Ilanngussaq 1)

Naalakkersuisut akissuteqaamminni 2014-imi innaallagissiorfinnit diesilitortunit innaallagissap atorneqanngitsup ataani takusinnaasassituut naatsorsorneqarsinnaanera takussuitissiaaraat.

Illoqarfinni kissap 33.200 MWh¹
sinnera
atorneqanngitsoq
Nunaqarfinni kissap 23.100 MWh
sinnera
atorneqanngitsoq
Kissap sinnera 56.300 MWh
atorneqanngitsoq
katillugu

Naatsorsueriaaseq tunngavigineqartoq ima nassuiaaserlugu saqqummiunneqartoq Ataatsimiititaliamit maluginiarneqarpoq.

1 ” Innaallagissiornermi kissap sinnerata atorneqanngitsup naatsorsorneqarsinnaanera nalorninartoqarpoq. Naatsorsuinermi illoqarfiit nunaqarfiillu Nukissiorfinnit pilersorneqartut kisimik ilaatinneqarput. Naatsorsuinermi aamma dieseloliap, innaallagissiorfinnit dieselimik atuisunit atorneqartup 40 procentiata missaata innaallagissiornerup atorneqartarneranik, taamaaqataatalu, 40 procentiata missaata, kissamik pilersitsiviusarneranik isumaqarneq tunngavigineqarpoq. Siaruarterinermi annaasat ilaatinneqanngillat. ”

Naalakkersuisut akissuteqaamminni kissaq sinneruttoq atorineqanngitsoq ukiumut 39 mio. koruunit missaannik naleqarnerarlugu erseqqissaatigaat. Tassani aamma Naalakkersuisut erseqqissaatigaat naatsorsuineranut taamaallaat illoqarfiit nunaqarfiillu Nukissioffinnit pilersorneqartut ilanngunneqarsimasut.

Qaanaami nukissioffimmi kiaap maangaannartinneqartussaagaluartup atorluarneqalersimanera aningaasannorlugu ukiumut agguaqatigiisitsinikkut qanoq naleqarneranut apeqqummut 3-mut Naalakkersuisut imatut akissuteqarput:

"Qaanaami innaallagissiornermit kissap sinneranik ungasianiit kiassarnermut aqqusersuutit aqqutigalugit kiassarnermik atuisoqarpoq, kisiannili aamma tamatuma saniatigut ungasianiit kiassarnermut aqqusersuutitigut kissaq utertoq Qaanaami imermik pilersuinermit nilannik aatsitsineranut atuisoqartarluni. Tassa imaappoq nunatsinni illoqarfinnut nunaqarfinnullu allanut nilannik aatsitsinikkut imiliornermut pisariaqartitsiffiunngitsunut naleqqiullugu kissaq sinneruttoq Qaanaami atorluarneqarneruvoq (issuaanermi oqaaseqatigiik kingulleq kalaallisuuani mininneqarsimammat Inatsisartut nutserisoqarfiannit nutserneqarpoq).

2014-imi Qaanaami kissap sinnera atorineqartoq 3.703 MWh-nik annertussuseqarpoq. Uulia atorlugu kissamik taama annertutigisumik tunisassioqartuuppat, Polaroi-ip maanna ikummatissamut akigititai tunngavigalugit ikummatissamut aningaasartuutitut 2,6 mio. koruunit missaat atorineqarsimassagaluarput. Taakkunangaanniit aningaasaliineranut kiisalu atortunik il.il. ingerlatsineranut aserfallatsaaliuinernullu aningaasartuutit ilanngaatineqassapput".

Naalakkersuisut akissuteqaamminni sumiiffinni amerlasuuni kissap sinneranik isumalluutitik atuinissaq ajornartutut inuiaqatigiillu aningaasaqarnerat eqqarsaatigalugu iluanaarutaasinnaangitsutut nalileraat ataatsimiititaliap maluginiarppaa. Ataatsimiititaliap tassunga atatillugu erseqqinnerusumik tusagaqarfigerusuppaa, Naalakkersuisut annaasaqarneq taamak annertutigisooq (39 mio. kr-it missaannik) annikillisarnerarlugu allanik pilersaaruteqarnerisut, naak tamanna takorluuilluni naatsorsuinerinnartut taaneqaraluartoq?

Inussiarnersumik


Michael Rosing,
Ataatsimiititaliap Siulittaasua



Ilanngussaq
Bilag 1

**Anthon Frederiksen, Inatsisartuni ilaasortaq, Partii Naleraq
/-Maani**

Kissaq sinneruttartoq pillugu § 37 naapertorlugu apeqqummut akissut

Asasara Anthon Frederiksen

Innaallagissiorfinnit dieselitortunit pilersuinermit kissap sinneruttup atorluarneqarnissaa pillugu apeqqutinnut qujanaq. Matuma kinguliani apeqqutitit ataasiakkaarlugit akissuteqarfigaakka.

1. Nukissiorfinni olie-mik atuiffiunerusuni kiaap sipporuttup atorneqanngitsoortarnera ataatsimut katillugit ukiumut agguaqatigiisitsinikkut qanoq aningaasanik amerlatigisunik atuiffiusarpa/ annaasaqataasarpa?

Akissut:

Ilisimatitsissutigisinnaavara, innaallagissiornermit kissap sipporuttartup, matuma kinguliani kissamik sinneruttumik taagukkama atorluarneqarnissaa sapinngisamik anguniartaratsigu.

2014-imi Nukissiorfiit innaallagissiorfinnit dieselitortunit kissap sinnera atorlugu kiassarnermi 54.000 MWh-nik pilersuisimapput. Tassunga assersuutitut ilisimatitsissutigineqarsinnaavoq, eqqakkanik ikualaanermit akunnaallisarlugit 28.000 MWh-t pilersuutigineqarsimmamata.

2014-imi innaallagissiorfinnit dieselitortunit kissap sinnera atorneqanngitsoq tamamiusiq imatut naatsorsorneqarsinnaavoq:

Illoqarfinni kissap sinnera atorneqanngitsoq	33.200 MWh ¹
Nunaqarfinni kissap sinnera atorneqanngitsoq	23.100 MWh
Kissap sinnera atorneqanngitsoq katillugu	56.300 MWh

Kissap sinnera aningaasannorlugu naatsorsorneqarsinnaasunngorlugu eqqortumik nalilerneqarnissaa ajornakusoorpoq. Kiassaat uuliatortoq atorlugu kissap taama

¹ Innaallagissiornermit kissap sinnerata atorneqanngitsup naatsorsorneqarsinnaanera nalorninartoqarpoq. Naatsorsuinermit illoqarfiit nunaqarfiillu Nukissiorfinnit pilersorneqartut kisimik ilaatinneqarput. Naatsorsuinermit aamma dieseloliap, innaallagissiorfinnit dieselimik atuisunit atorneqartup 40 procentiata missaata innaallagissiornerup atorneqartameranik, taamaaqataatalu, 40 procentiata missaata, kissamik pilersitsiviusarneranik isumaqarneq tunngavigineqarpoq. Siaruarterinermi annaasat ilaatinneqanngillat.

20-08-2015
Sags nr. 2015-7445
Akt. nr. 878754

Postboks 1614
3900 Nuuk
Tlf. (+299) 34 50 00
Fax (+299) 34 54 10
E-mail: paian@nanog.gl
www.naalakkersuisut.gl

annertutigisup tunisassiarineqarsinnaanera aallaavigineqarsinnaavoq, taamatut kissamik tunisassiorneq nalinginnaasumik kissap sinnera atorlugu kiassanermut taartaasinnaammat.

Nalileeriaaseq nassuiaatigineqartoq atorlugu kissaq sinneruttoq atorneqanngitsoq ukiumut 39 mio. koruunit missaannik naleqarpoq². Nalileeriaaserli taanna missiliuinerinnaavoq, aammalu teknologimik nutaamik ikkussuinerlut, ingerlatsinerlut aserfallatsaaliuinerlut aningaasartuutit ilaatinneqanngillat. Sumiiffinni amerlasuuni kissap sinneranik isumalluutit atuinissaq ajornarpoq inuiaqatigiillu aningaasaqarnerat eqqarsaatigalugu iluanaarutaasinnaanani.

Kissap sinneranik atuisoqassappat, kissap sinneranik katersuisinnaasumik aammalu ungasianiit aqqusersuutit aqutugalugit siararterisinnaasumik atortuliisoqartariaqarpoq. Ungasianiit kiassarnerlut aqqusersuutit sanaartorneq akisuujuvoq, kissarlu ungasinnerusumut assartorneqassappat ingerlanerani kissamik annaasaqartoqartussaavoq. Tamatuma kingunerisaanik sumiiffinni amerlasuuni, soorlu innaallagissiorfeeqqamit kissap sinneranik killilimmik pilersitsisartumit, imaluunniit illut siammassippata, taamaalillunilu ungasissumut sanaartortoqassappat kissap sinneranik atuinissaq imminut akilersinnaanngilaq, ungasianiit kiassarnerlut aqqusersuutit akisuut sananeqartussaammata.

2. Kiaap atorneqanngitsoortarput atorluarneqarnerunissaa anguniarlugu naalakkersuisut qanoq pilersaaruteqarpat?

Akissut:

Naalakkersuisut Nukissiorfiit kommunillu suleqatigalugit nukissiuuteqarnermi isumalluutitsinnik annertusaanissaq aalluppaat, tassanilu ilaatigut innaallagissiorfinnit dieselitortunit ikuallaavinnillu akilersinnaasunit kissap sinneranik atuinissaq ilaatinneqarpoq. Sanaartorfissagissaanermut iluarsaassinernullu atatillugu kissap sinneranik atuinissaq pingaartinneqartorujussuuvoq.

Assersuutigalugu Nukissiorfiit illoqarfinni annerni ungasianiit kiassarnerlut nunap assinginik inaarsaapput. Tamatuma kingorna nunap assingi taakku kommunit ungasianiit kiassarnermik annertunerpaamik atuinissaq qulakkeerniarlugu, najukkanut pilersaarutit teknikkimut tunngasortaannik nutarterinerlut atorsinnaassavaat.

3. Qaanaami nukissiorfimmi kiaap maangaannartinneqartussaagaluartup atorluarneqalersimanera aningaasanngorlugu ukiumut agguaqatigiisitsinikkut qanoq naleqarpa?

Akissut:

Qaanaami innaallagissiornermit kissap sinneranik ungasianiit kiassarnerlut aqqusersuutit aqutugalugit kiassarnermik atuisoqarpoq, kisiannili aamma tamatuma saniatigut ungasianiit kiassarnerlut aqqusersuutitigut kissaq utertoq Qaanaami imermik pilersuinermi nilannik aatsitsinerlut atuisoqartarluni.

² Uuliamut literimut akisuoq 6,20 koruuniusoq aamma kiassaatiq uuliatortup atuisinnaassusiata 90%-iunera aallaavigalugu.

2014-imi Qaanaami kissap sinnera atorneqartoq 3.703 MWh-nik annertussuseqarpoq. Uulia atorlugu kissamik taama annertutigisumik tunisassiortoqartuuppat, Polaroil-ip maanna ikummatissamut akigititai tunngavigalugit ikummatissamut aningaasartuutitut 2,6 mio. koruunit missaat atorneqarsimassagaluaput. Taakkunanngaanniit aningaasaliinermut kiisalu atortunik il.il. ingerlatsinermut aserfallatsaaliuinernullu aningaasartuutit ilanngaatigineqassapput.

Inussiarnersumik inuulluaqqusillunga

Mala Høy Kúko



**Aningaasaqarnermut akileraartarnermullu
ataatsimiititaliamut**

Ulloq: 14. oktober 2015
J.nr.: 01.31.11-000xx

**AIS 2016 pillugu Sanaartornermut ataatsimiititaliamut attuumassutilinnut
Aningaasaqarnermut ataatsimiititaliap tusarniaanera**

- Sanaartornermut ataatsimiititaliap sinnerlugu AIS 2016 pillugu Sanaartornermut ataatsimiititaliamut attuumassutilinnut tusarniaanermit akissuteqarnissamut periarfissinneqaratta qujamasoqaanga. Ataatsimiititaliat attuumassutillit AIS pillugu Aningaasaqarnermut ataatsimiititaliap suliqaarnerani ilapittuuteqarnissamut taamaalillutik periarfissinneqarnerat pingaaruteqarlunilu tikilluaqqunarpoq, taamaaliornikkummi Nunatta Aningaasiviata aningaasaataanik Inatsisartut ataatsimut pingaarnersiunerat ersersinneqarluarsinnaammat. Sanaartornermut tunngasut AIS-imi initoqaat, taakkulu pisarnertut eqqumaffigineqartaqaat. Taamaattumik Sanaartornermut ataatsimiititaliap AIS-imut akissuteqarnissani pingaarteqaa.

- Sanaartornermut ataatsimiititaliap oqaaseqaatit uku Aningaasaqarnermut ataatsimiititaliamut nassiuppai, Aningaasaqarnermut ataatsimiititaliap ulluni tulliuttuni isumasiunermit apeqqutaanut Aningaasaqarnermut ataatsimiititaliap oqaaseqaatit tamakku ilanngussinnaaniaasammagit, aamma/imal. AIS pillugu ataatsimiititaliap isumaliutissiissutissaannut ilanngunneqarsinnaaniassammata. Tamakku pillugit Sanaartornermut ataatsimiititaliap paasisaqarnissani qilanaaraa.

Sanaartornermut ataatsimiititaliap ataatsimut isigalugu AIS-imut annikitsuinnarnik oqaaseqaatissaqarpoq, Ataatsimiititaliammi iluarisimaarlugu paasivaa, Aningaasaqarnermut ataatsimiititaliap AIS16 pillugu apeqqutimigut oqaaseqaatimigullu peqqissaarluinnarsimasoq, pisortallu sanaartugassaataannut tunngassuteqartutigit apeqqutinik naleqquttunik arlalissuarnik apeqquteqarsimasoq.

Sanaartornermut ataatsimiititaliap suliassa qarfiit siunertaqarfillu Aningaasaqarnermut ataatsimiititaliap Sanaartornermut ataatsimiititaliamut immikkut naleqqussorisimasai allakkatigit matumuuna aallaavigivai, Ataatsimiititaliali naliernikuuaa suliassa qarfiit 80-imiit 89-imut tamarmik Sanaartornermut ataatsimiititaliamut attuumassuteqartuusut, pisortanimmi sanaartortitsinerit tamarmik Sanaartornermut ataatsimiititaliap susassa qarfigimmagit.

Konto pingaarneq 70.01.04 Sanaartornermi aqutsineq suliniutinullu aningaasartuutit

- a) Inissiani Illuut A/S-imit pigineqartuni attartortut attartortutut pisinnaatitaaffitik attartornermut isumaqatigiisummi aningaasanullu inatsisiniunngitsaq qaqugu atuarsinnaalernissaat naatsorsuutigisinnaavaat?

Konto pingaarneq 72.20.05 Ilaasunik angallassinermut tapiissutit

Sanaartornermut tunngasutigut kiffartuussinermut aningaasaliisutissanut atatillugu Naalakkersuisut isumaqatigiinniuteqarsinnaanerit Aningaasaqarnermut ataatsimiititaliamit 2016-imi akuerineqartussaamat Sanaartornermut ataatsimiititaliap ajunngitsutut isigaa. Sanaartornermut ataatsimiititaliap qinnutigaa, tamanna pillugu aningaasaliissuteqarnissamut suliaq taamanikkornissaanut Naalakkersuisunit nassiuunneqarpat, Sanaartornermut ataatsimiititaliamut Aningaasaqarnermut ataatsimiititaliamit tusarniaassutigineqaqqaassasoq.

Sanaartornermut ataatsimiititaliap tamatuma saniatigut isumaqarpoq, mittarfinnik nutaanik sanaartornissamut Naalakkersuisut pilersaarutaannut angallassinermi kiffartuussinermut isumaqatigiissutialiassat ataqatigiissinnissaat aamma ilanngullugit eqqarsaatigineqartariaqartoq

Tassunga atatillugu angallannermut tunngasutigut Sanaartornermut ataatsimiititaliap aalajangiiffigisassatut siunnersuutai marlut siusinnerusukkut saqqummiussimasai Sanaartornermut ataatsimiititaliap malugeqqussavai. Sanaartornermut ataatsimiititaliap maanna atuuttup aalajangiiffigisassatut siunnersuutinit taakkunanit ataaseq saqqummiuteqqippaa, ataatsimulli isigalugu isumaqarluni, siunnersuutinit tunuliaqutaasut, tassa nunami namminermi ilaasunik timmisartuussinerit pisariillisarnissaat akikillisaarnissaallu, tunngaviatigut suli tapersersorneqartariaqartut, taamaattumillu siunnersuutini tunngaviatigut isummat maanna Naalakkersuisuusut mittarfiit tungaasigut misissuinerannut ilaatinneqartariaqartut.

Konto pingaarneq 72.20.10 Usinik assartuineq

2011-imi siunnersortit avataaneersut atorneqarnerisigut Royal Arctic Line-mi (RAL-imi) ukiumut pisariillisaanermut iluaqtissat 30 mio. kr.-nik nalillit nassaarineqarsimanerat Ataatsimiititaliap soqutiginaqisutut pingaaruteqartutullu isigaa. Pisariillisaanermut iluaqtissat atuutilersimanngitsuuppata, RAL-ip akigititaasa ukiuni kingullerni qaffaavigineqarnerusariaqarsimanerat naatsorsuutigineqarsinnaavoq, pissusiviusutigulli taamaangilaq.

Ataatsimulli isigalugu Nunatta Aningaasiviata unammilligassai pissutigalugit tamanna itigartikkuminaatsutut isikkoqarpoq, pilersuiner mummi tunngassuteqartuni assingusuni pisortat ingerlatsiviutitsinni kisermaassiffiusuni angisuuni taamaaqataanik siunnersortinit *avataaneersunit* sukumiisumik misissuititsisoqartariaqarpoq, matumanilu immikkut Tele Greenland pineqarpoq, taannami malunnaateqaqisumik ukiut tamaasa sinneqartooruteqartarpoq. Tamanna pisinnaavoq attaveqatiginnikkut akikillisaanissaq siunertaralugu, aamma internetip nunap immikkoortuini tamani ingammillu ilinniartitaanerup

siuarsarnissaa siunertaralugu ingerlatseqatigiffiup akissaaajaatitigut sulisoqarnikkullu aaqqissuussinerata isornartorsiorpalaartumik nalilersorneratigut.

Suliassaqarfik 80-89 Sanaartornermut tunngasut

Ukiuni kingullerni pisortat sanaartugassatigut sinaakktissaat, ukiut ataasiakkaarlugit suliassaqarfinni 80-89-miittut Aningaasanut inatsisini pisortat aningaasaliissutaatut ataatsimut paasineqartariaqartut, takussutissiami tulliuttumi takuneqarsinnaapput:

Ukioq aningaasaliiffiusoq ¹	Sanaatugassanut sinaakktissat AI/AIS (mio. kr.)	Ilassutitut aningaasaliissutit IA-inatsimmiittut (mio. kr.)	Sanaartornermut sinaakktissat AI+IA (mio. kr.)
AIS 16	613,5		
AIS 15-II	607,7	-	-
AIS 15-I	679,0	-	-
AI 14	778,9	131,4	910,3
AI 13	779,4	-124,9 ³	654,5
AI 12	946,4	78,2	1.024,6
AI 11	937,4	174,0	1.111,4
AI 10	757,6	1,5	759,1

Takussutissiami qulaaniittumi pissutsit arlallit aallaaviusinnaapput:

- a. 2012-imili sanaartornermut sinaakktissatut missingersuutit *appariartuaartutut* pissuseqarput. Piffissamili tamatumani pisortanit aningaasaliissutit ataatsimut isigalugu *qaffakkiartuaarsimapput*. Allatut oqaatigalugu pisortanit aningaasartuutit suli amerliartuinnartut ataavartumik ingerlatsinermut aningaasartuutit atorneqartarput, annikinnerusumillu sanaartornermut aningaasalersuinerit atorneqartarlutik, sanaartornermummi aningaasalersuinerit eqqortumik aningaasalersuiffissaqartillugu inuiaqatigiit aningaasaqarnerannut ajunngitsumik *pilersitsisinnaapput*.
- b. Sanaartornermut sinaakktissat ataatsimut isigalugit nikerartorujussuusimapput. Ukiumiit ukiumut nikerarnerit 150 mio. kr.-t tungaanoortuusarput. Taama annertutigisumik nikerarnerit sanaartornermik suliaqartunut arlaannaatigulluunniit iluaqutaagunangilaq, sanaartornermimmi suliaqartut sulisorisanik akuttunngitsumik soraarsitsisarlutillu sulilersitsisariaqartarput. Taamaalilluni sanaartornermik suliaqartuusut sulisuminnik aalajangersimasunik tatiginartunillu sulisoqarnissaminnut periarfissaat killilerneqartarpoq, taakkumi inaagaqarsinnaanermik pitsaassutsimillu qaffaseqisumik isumannaarinnissinnaapput, taamaaliornikkullu sannarlutat killilerneqarsinnaalutik.

¹ Malugeqqusaq: Aningaasanut inatsit avaqqullugu pisortat aningaasalersuutigisinnaasai takussutissiami naatsorsuutigineqanngillat, assersuutigalugu aktiaatileqatigiiffinneersut.

³ Nukissiorfinnut sanaatugassanut taarsigassarsiat 100 mio. kr.-nik ikilineqarsimanerat aningaasartaani immikkut takuneqarsinnaavoq, taakkulu isertitatut inissinneqarput. Aningaasat aktiaatileqatigiiffimmut nutaamut Nuummi Atlantikup ikaarneranut nutaamik umiarsualiviliornermut nuunneqarput.

- c. Ukiup aningaasaliiffiusup ingerlanerani sanaartornermut ataatsimut sinaakkusiaasut tulluanngivissumik amerlaqisut ilassutitut aningaasaliissutinit pisarput. Tamanna missingersuusiortarnermut atatillugu tulluartuusunnginnerata saniatigut, aningaasanullu inatsisip Inatsisartut ataatsimut tulleriarineranut tunngavigisamut tulluartuunngimmat, tamannalu Aningaasaqarnermut ataatsimiititaliamut attuumassuteqarmat, taamatut missingersuusiortarnermi pissutsit naammaginngitsut soorlu qulaani imm. b-mi taaneqartutut ittut pilertarput.

Siuliani inerniliussaagallartut tunngavigalugit Aningaasaqarnermut ataatsimiititaliaq Naalakkersuisunik oqaloqateqassasoq Sanaartornermut ataatsimiititaliap kaammattussavaa. Nuna tamakkerlugu sanaartornissamut kissaatigisat pisariaqartullu annertoqisut imaaliiallaannaq suussusersineqarsinnaapput, tamakkulu sanaartornermut kissaatigisat piviusunngortissinnaanerannut ataatsimut isigalugu pisortanit sanaartornermut sinaakkutissat ukiumiit ukiumut allaqqussassaangitsumik killiliisussaassapput, ingerlatsinermut aningaasaliissutinit minnerunngitsumillu tapiissutitut aningaasaliissutinit aningaasartuutit qaffakkiartornerat pissutigalugu.

Tamatuma saniatigut Sanaartornermut ataatsimiititaliap ilisimavaa, sanaartornermik suliaqartut aamma suliaqarfiit kattuffiisa pisortanit sanaartukkat pillugit ukiuni arlaqalersuni sinaakkutissanik aalajaannerusunik kissaateqartarnerat, qulaanilu kisitsit taamatut isummernornut tapersiinermik takutitsisuusut isumaqarnartoq.

Pingaarnertut ataatsimulluunniit sanaartortitsinermut sanaartornermik suliassat ataatsimut isigalugu amerlanerit neqeroorutigineqartartut maluginiarneqarpoq. Akinut atatillugu ilu-aqutit ajoqutillu suut misilittagarineqarpat? Tunniunneqartup pitsaassusianut atatillugu? ... Isumaqatigiissutigineqartumut sanilliullugu piffissaq tunniussiffiusumut atatillugu? ... Sulisoqarnermut atatillugu? ... Suliffeqarfiit ilinniartunik/lærlinginik tiguisinnaanerannut atatil-lugu? ... Misilittakkanullu allanut atatillugu?

Sanaartornermut ataatsimiititaliap Nuna tamakkerlugu pilersaarusiamut nassuiaat kingulleq ilisimavaa, qanorlu taanna tulleriarilluni aalajangiiniarnerup ingerlanneqarnerani timitalerneqartarnerasoq.

Konto pingaarneq 83.30.13 Nuna tamakkerlugu paaqqinniffiit

Kontomi pingaarnermi tassani nuna tamakkerlugu innarluutillit sungiusartarfiannik pilersitsinissamut ukiumut aningaasanut inatsimmut ukiunullu missingersuusiortifiusunut agguataarlugit katillugit 51,2 mio. kr.-t aningaasaliissutigineqassasut immikkut siunnersuutigineqarpoq (Suliassaq nr. 080.40.054).

Tamanna pillugu Sanaartornermut ataatsimiititaliaq kingullermik ima taasaqarpoq: Suliassamut allaaserisami takuneqarsinnaavoq suliffeqarfimmu tassunga ilaassasoq IPIS, sungiusaavik ikiuutilersuisarfillu. Takuneqarsinnaavortaaq suliffeqarfik Sisimiuniissasoq. Taamatut inissinnissaanut tunngaviusumut suliassaq pillugu ima allaaserisartaqarpoq: *“Aammattaaq sullissiveqarfiup Sisimiunut inissinneqarnissaa aalajangiunneqarsimavoq, aningaasaliissutit*

*piginnaasanillu ineriartortitsinerup nuna tamakkerlugu
siammarterneqarnissaat inuiaqatigiinnut iluaqutaasussatut isigineqarmat”.*

Pissutsit pisariaqartullu nalinginnaasut isiginiarlugit sanaartornermut pisortanit aningaasaliissutit nuna tamakkerlugu siaruaanneqartariaqarnerat Sanaartornermut ataatsimiititaliap tunngaviatigut isumaqatigaa. Taamaattorli nuna tamakkerlugu innarluutilinnik sullissiviup Sisimiuni inissinneqarnissaanik aalajangiineq imaaliiallaannaq paasinanngilaq. Taamaalluni IPIS-ip Sisimiunut nuunnissaani suliassamut tamatuma akitsorsaataanissaa avaqqunneqarsinnaanngilaq. Tamatuma saniatigut assingusumik nuussisarnerit misilittagaqarfiupput; sulisut amerlaqisut nutsernermut atatillugu suliffimminnit soraartarnerput, assersuutissaavorlu Nuka A/S-ip Nuummit Maniitsumut nuunneqarnera imaluunniit Polar Oil A/S-ip Maniitsumit Sisimiunut nuunneqarnera. Ingerlatsivinnut ajoqutaaqisumik annaasaqaataasumillu ilisimasanik annaasaqarneq annertoqisoq nutsernemi marluusuni pisimavoq, taakkulu atuisunit akileraartartuniillu matussuserneqartariaqarsimapput. Tamatuma saniatigut pissusissamisoorpasippoq innarluutilinnik sullissiviup Nuummi nuna tamakkerlugu napparsimmaviup qanittuani inissinneqarnissaa iluaqutaassasoq, immikkummi ilisimasallit, assersuutigalugu fysio- aamma ergoterapeutit, nakorsat immikkut ilinniarsimasut, tassaniinnissaat naatsorsuutigisariaqarmat – minnerunngitsumillu napparsimasut/sullitat, taakkumi pineqarnerat naatsorsuutigisariaqarmat.

Taamaattumik Sanaartornermut ataatsimiititaliap Aningaasaqarnermut ataatsimiititaliaq kaammattussavaa, suliassap tamatuma inissinneqarneratalu sukumiilluinnartumik isiginiarnissaanut, inissiinerup kingunerisaanik annertunerusumik akissajaateqarnissamik kinguneqarnissaani, minnerunngitsumillu inissiinerup kingunerisaanik innarluutilinnut ajoqutaasinnaasut eqqarsaatigalugit tamakku isiginiarneqarluinnarnissaat. Oqaatigineqartut pisortanit sanaartornermut aningaasalersuinerit nunami siammarneqarnissaat Sanaartornermut ataatsimiititaliap tunngaviatigut tapersersorpaa, kisiannili innarluutilinnut ajoqutaanissaanik kinguneqassappat, imal. qitiusumik sulianut soorlu innarluutilinnik sanngiitsunillu ikiuinermut annertuumik ilisimasanik annaasaqarnermik kinguneqassagaluarpat taamaaliortoqartariaqarani.

Sanaartornermut aningaasalersuinerit nunami siammarnissaannik siunertaq attatiinneqassappat, Sanaartornermut ataatsimiititaliap taarsiullugu **kaammattuutigissavaa ilinniartitaanermut, ilinniartut ineqarfiinut attaveqarnermilu suliniutinut aningaasaqarnikkut imminut akilersinnaasunut, soorlu aqqusiniliornernut, pisortat inissiaataasa oqorsaasersornerinut kiisalu imermik kissamillu uuttuutit atulersinneqarnissaannut, aningaasalersuisoqassasoq.**

Sanaartornermut ataatsimiititaliaq suli taama isumaqarpoq.

Konto pingarneq AI 2015-imi ukiuni missingersuusiorfinni 90,5 mio. kr.-nit 162,8 mio. kr.-nut qaffariaateqarsimasoq Sanaartornermut ataatsimiititaliap maluginiarpaa. Tamanna qaffariaat malunnaateqarluarpoq, 70 mio. kr.-t missaat iml. 80 %-t missaat qaffariaataasimavoq.

Tamanna tunngavigalugu Sanaartornermut ataatsimiititaliap paaserusuppaa, maanna qaffariaateqartitsinikkut Nunattalu Aningaasiviata aningaasanik amigaateqarnerani, tamanna akiitsunut aningaasaliinernullu periusissiamut atuuttumut qanoq naapertuunnersoq?

Immikkullu Sanaartornermut ataatsimiititaliap immikkut paaserusuppaa, taamatut maannakkut qaffariaateqarnikkut siuliani taaneqartutut inassutigineqartutullu ingerlatsineranut akissaajaatit ikililernissaat salliutinnagu ingerlatsineranut akissaajaatit sulii qaffannissaannut aningaasalersuinissaq ilumut pissanersoq.

Konto pingarneq 86.60.01 Peqqinnissaqarfik

- a) Illorsuarni nakorsiartarfimmut 7,5 mio. kr. aningaasaliissutaassasut Ataatsimiititaliap maluginiarpaa.
- b) Nakorsiartarfiup m2-nik qassinik angitiginissaa naatsorsuutigineqarpa?
- c) Nakorsiartarfiup pilersaarutigineqartup sanaartornissaata akikillilernissaa periarfissaasinnaava?
- d) Maannamut pisut pillugit Ataatsimiititaliaq nassuiaammik kissaateqarpoq
- e) Illuut pigineqartup nakorsiartarfittut atorneqarsinnaasunngorlugu nutarterneqarsinnaassava?
- f) Assersuutigalugu nunaqarfimmi illu sullivik nakorsiartarfittut atortulernissaa siunertaralugu nutarterneqarsinnaava iml. allangortitersinnaava?
- g) Maanna iml. siusinnerusukkut peqqissutsimut naalakkersuisumit suliniut taanna aallarnisarneqarpa?
- h) Nakorsiartarfiup ukiumut nal. ak. qassit atorneqartarnissaa naatsorsuutigineqarpa?
- i) Piffissami 2011-mit 2014-imut innuttaasut 103-niit 70-inut allanguuteqarsimanerat – iml. kinguariaat 30 %-t missaaniittoq – Naalakkersuisut uppernarsinnaavaat?
- j) Innuttaasut 70-t missaaniittut kiffartuunneqarnissaannut 7,5 mio. kr.-t atorneqarpata, nuna tamakkerlugu 5,5 mia. kr.-t missaanni atorneqarnissaannut naapertuutissasoq Naalakkersuisut isumaqatigisinnaavaat? Imaluunniit naalagaaffimmit tapiissutigineqartartut 1,5-t missaannik amerlisarlugit?
- k) Taamatut aningaasanik pingaarnersiuneq nammaqatigiinnertut Naalakkersuisut isumaqarfigaat?
- l) Naalakkersuisut taamatut pingaarnersiuneq nammaqatigiinnertut isumaqarfigippassuk, Nuummi Nuussuarmi/Qinngutsinni nakorsiartarfik pillugu naalakkersuinikkut isummorsorfineqartumut qassinik aningaasaliinissaq nammaqatigiinnerunersoq Naalakkersuisut isumaqarfigaat?

Konto pingarneq 87.73.12 Umiarsualivinnut talittarfinnullu aningaasaliissutit

- a) Ataatsimiititaliap paasivaa, 2016-imi ukiumut aningaasaliiffiusumut ukiunullu missingersuusiorfiusunut 25,2 mio. kr. aningaasaliissutigineqassasut. Tamatumunnga atatillugu Ataatsimiititaliaq kingumut qiviarsimavoq, ilaatigullu maluginiarsimallugu pineqartumut ukiuni arlalinni kingullerni iluarsartuussineranut aningaasanik naammaannaqisunik tunniussisoqartarsimasoq. Folketingets 1986/1

LSF 28 tunngavigalugu 1987-imi naalagaaffimmit ukiumut 17 mio. kr.-nik aningaasaliissuteqartoqartarsimasoq Ataatsimiititaliap aamma maluginiarpa. Aningaasat taakku 2015-imi ullutsinnut naatsorsoraanni 31,7 mio. kr.-t missaannik naleqassapput. Allatut oqaatigalugu amigartooruteqartoqarpoq. Umiarsualiviit talittarfiillu maanna naammaginartumik inisisimanersut kiisalu piffissaq tamakkerlugu pineqartup nunatsinnit tigoreernerata kingorna taamaattoqarsimanersoq Naalakkersuisut isumaqarfigaat?

- b) Inatsit pingarneq Inatsisartut peqqussutaat nr. 4, 3. Juni 1999-imeersoq pineqarani soq allannguutitut inatsit Inatsisartut peqqussutaat nr. 2, 27. Marts 2006-imeersoq innersuussutigineqarnersoq itisilerneqarsinnaava?
- c) Aamma Naalakkersuisut uppersarsinnaavaat Inatsisartut inatsisaat nr. 9, 3. Juni 2015-imeersoq akuerineqarsimanersoq aamma atortussanngortinneqarsimanersoq?

Konto pingarneq 89.71.41 Nukissiorfiit, sanaartornermut taarsigassarsiaritit, nunagissaaneq

- a) Iisimatitsissutigineqarpoq Nukissiorfiit aningaasaliissutit pillugit ukiumoortumik nassuiaateqartartut, taakkumi Sanaartugassanut Iluarsagassanullu Aningaasaateqarfik pillugu Nassuiaammut ilanngunneqartarmata. Pisortanit aningaasaliissutit tunniunneqartartut atugaanerinit periusissiamik Naalakkersuisut aamma suliaqartarpat?
- b) Nunagissaanermut akissaajaatit nunatta suatungaani sumi atorneqartarpat? Pineqartunullu assigiinngitsunut qanoq tulleriaarisooqartarpa?
- c) Paasissutissiissutigineqarpoq Nukissiorfiit nunagissaanermik ingerlatsineranni kommunit nunagissaanermik ingerlatsinerat qaangerneqartarnersoq imaluunniit kommunit nunagissaanermik ingerlatsineranni Nukissiorfiit nunagissaanermik ingerlatsinerat qaangerneqartarnersoq? Assersuutigalugu imaattoqarsinnaava sumiiffiit kuuffilersorneqarsimasut imermilli qiperiaannarmik peqaratik?
- d) Ingerlatsinerami akissaajaatit ikilinissaannut Nukissiorfinni aningaasalersuinissamut suliniutit suut eqqarsaataasinnaappat?
- e) Aasiaat tungaanut TeleGreenland A/S-imit immap naqqatigut kabel-ileeratarsinnaanermut atatillugu piffissami tassani ataatsikkut sarfamut sakkortuumut kabel-iliisinnaaneq (højspændingskabel) (sarfaq sakkortoq jævnstrømusinnaavoq, amerlanertigullu HVDC-mik (High Voltage Direct Current) taaneqartartoq) Naalakkersuisut isumaliutigikuaat? Siunertarineqarpoq pilersuinerup isumanaassuseqarnissaa, taamaalillunilu innaallagissiorfinnut sillimmataasunut akissaajaatit ikilisinneqarsinnaallutik, ataatsimullu isigalugu nunatsinni attaveqaatit ataqaatigiissinnissaat, innaallagiarlu mingutsitsissutaannginnerusoq nunap immikkoortuinut amerlanernut ingerlanneqarsinnaanissaa.

Konto pingarneq 89.72.11 Nammineq inissianik tapiissutitalimmik sanaartorneq

- a) Inissiat pillugit aqqissuusseqqinneq qangali neriorsuutigineqartoq sumut killippa?

Inussiarnersumik


Anders Olsen

Sanaartornermut ataatsimiititaliami siulittaasoq



INATSISARTUT

Aningaasaqarnermut Akileraartarnermullu
Ataatsimiititaliamut
MAANI


Ulloq: 13. oktober 2015
J.nr.: 01.36.02.05-00131

Aningaasanut inatsisissamik suliaqarnermut atatillugu ataatsimiititalianik susassaqtunik Aningaasaqarnermut Akileraartarnermullu Ataatsimiititaliap tusarniaanera.

Aallarniutigalugu Aningaasaqarnermut Akileraartarnermullu Ataatsimiititaliap Inuussutissarsiornermut Ataatsimiititaliamut saaffiginnissutaa Inuussutissarsiornermut Ataatsimiititaliap qujassutigaa. Aningaasaqarnermut Akileraartarnermullu Ataatsimiititaliap saaffiginnissutaa ataatsimiititaliamit misissorneqareerpoq aammalu Aningaasaqarnermut Akileraartarnermullu Ataatsimiititaliamit allakkanut tiguneqartunut oqaaseqaateqarnissaminut tunngavissaqarsorinani.

Taamaakkaluartoq konto pingaarnerup 64.10.27-p aammalu kontomi pingarnermi tassani aningaasaliissutit suliniutinik angisuunik, tassunga ilanngullugu Kuannersuarni suliniummik ineriartortitsinissamut nittarsaassinissamullu atorneqarnissaat eqqarsaatigalugu Aningaasaqarnermut Akileraartarnermullu Ataatsimiititaliamit malugeqquniarneqarnissaannut Inuussutissarsiornermut Ataatsimiititaliap pissutissaqarsoraaq. Tunngaviusumik isigalugu aatsitassarsiornermik ingerlataqartup misissueqqaarnernut nittarsaassinernullu aningaasartuutit nammineq akilertariaqaraluarpai. Tamanna tunngavigalugu Aningaasaqarnermut Akileraartarnermullu Ataatsimiititaliap aningaasanut inatsisissatut siunnersuummik ingerlaavartumik suliaqarnermini apeqqummik tamatumingna misissueqqullugu Inuussutissarsiornermut Ataatsimiititaliamit kaammattorneqarpoq.

Inussiarnersumik inuulluaqqusillunga


Aqqaaluaq B. Egede
Siulittaasup tullia



Aningaasaqarnermut Ataatsimiititaliaq

Ulloq: 19. oktober 2015

J.nr.: 01.38.01.05-00065

2016-imi aningaasanut inatsisissatut siunnersuummi isumaginninnermut peqqissutsimullu tunngasut.

2016-imi aningaasanut inatsisissatut siunnersuummi isumaginninnermut peqqissutsimullu tunngasut pillugit Ilaqutariinnermut Peqqissutsimullu Ataatsimiititaliap oqaaseqaatai Aningaasaqarnermut Akileraartarnermullu Ataatsimiititaliap kaammattuuteqarneratigut matumuuna nassiunneqarput:

Ataatsimut isigalugu

Peqqissutsimut Naalackersuisumik aammalu Ilaqutariinnermut, Naligiissitaanermut Isumaginninnermullu Naalackersuisumik ataatsimeeqateqarnermigut allaqatiginninnermigullu suliaasaqarfinni arlalinni killiffiit aammalu taakku 2016-imi aningaasanut inatsisissatut siunnersuummi aningaasaliissutiginiarneqartunut ataqatiginnerat ataatsimiititaliap paasiniaaffigai.

Peqqinnissaqarfik taamatullu isumaginninnermut tunngasut annertuumik sipaarneqarfigineqannginnissaat pingaaruteqarmat ataatsimiititaliamit erseqqissarneqassaaq. Tamanna matuma kinguliani erseqqinnerusumik itisilerneqarpoq.

Peqqinnissamut tunngasut:

Peqqinnissaqarfiup sullississutaasa annikillisinneqarnissaannik politikikkut aalajangertoqanngippat peqqinnissamut tunngasuni maannangaaq sipaaruteqarnissamut periarfissaqarsorinangilaq. Politikikkullu taama aalajangertoqalersaarsorinangilaq. Peqqinnissaqarfiup aningaasaqarneranik misissuineq nutaaq peqqinnissaqarfimmit aallartinneqarsimasoq ataatsimiititaliamit ilisimaneqarpoq. Tamanna Deloitte 2010-mi misissuineranut malitseqartitsissutaavoq. Misissuinnikkut kingullikkut uppersarneqarpoq nunat avannarliit sinnerinut sanilliulluta aningaasaliissutit atorlugit peqqinnissakkut annertuumik angusaqartartugut, aappaatigulli sipaaruteqarnissamut tunngavissaqarsorinangilaq. Pisariillisaanissarli aaqquussaanikkullu naleqqussaanerit ingerlaavartumik sulissutigineqartuarput.

Kontomi pingaarnermi 20.11.70-imi, *suliniutinut nutaanut sillimmatinut* tunngasumi, atorerluisunik katsorsaanissamut pilersaarummut aningaasaliisoqarsimanera ataatsimiititaliamit nuannaarutigineqarpoq. Aningaasat atorerluisunik katsorsaanissamut pilersaarummut aningaasaqarnikkut tapersiissutitut atugassiissutigineqarnissaat ataatsimiititaliamit sakkortuumik taparserneqarmat erseqqissarneqassaaq,

uppernarsaatissaqarluarpormi ilaatigut imigassamik hashimillu atornerluineq inuttut aningaasaqarnikkullu inuiaqatigiinnut annertooujussuarnik kingunerluuteqartartoq.

Innuttaasut peqqissuunissaannik pilersaarut Inuuneritta II 2013-2019 pilersaarutit malillugit ingerlavoq. Pinaveersaartitsinermik suliniutit innuttaasunut inuiaqatigiillu ineriartornerannut pingaaruteqarluinnartutut ataatsimiititaliamit isigineqarput. Assersuutigalugu imminut toquttarnerup, atornerluinerup pujortartarnerullu annertooujussarmik atugaaneri annikillisikkumallugu suliniutit naleqqussarneqarnissaat pisariaqartinneqarnerisooq ataatsimiititaliamit ingerlaavartumik eqqumaffigineqarpoq.

Pinaveersaartitsiniarnermik suliniutinut tunngatillugu naalakkersuisoqarfiit aqutsisoqarfillu susassaqtut kommunit pinaveersaartitsiniarnermik suliaqarneranni siusinnerusumut sanilliullugu ikiuunnerunissaat ataatsimiititaliamit kissaatigineqarpoq, tamatumani siusissukkut iliuseqarnissap qitiutillugu aallunneqarnera annertusineqassalluni. Kommunit pinaveersaartitsiniarnermik pilersaarutit assigiinngitsut nunap immikkoortuini kommuninilu toqqaannartumik atornerqarsinnaasut qitiusumit suli annertunerusumik neqeroortigineqarsinnaappata, tamanna inuiaqatigiinnut iluaqutaassaaq. Pinaveersaartitsiniarnermik pilersaarutinut assersuutigalugu ilaatinneqarsinnaapput Inuusaq atorlugu suliniutip siammarterneqarnissaanut malitseqartinneqarnissaanullu pilersaarutit, eqqiluisaarnissamut suliniutit, soorlu kinguaassiutitigut nappaatit pillugit peqqissutsikkut pissutsit immikkut sammineqarnissaanni suliniutit kommunini ingerlanneqarsinnaasut, imigassamik ikiaroorartumilluunniit atornerluinerup sunniutai imaluunniit nunap immikkoortuini pinaveersaartitsinermut ataatsimiititaliani sammineqartussanut isumassarsiasat arlallit imarisinnaavai, immikkut sammisassaqluni ulloqartitsinerit innuttaasunik soqutiginnittuunniit ataatsimiitsinerni isummersuutit il.il.

Kommunit sulisussanik aningaasanillu amigateqarnertik pissutigalugu pinaveersaartitsinermi pilersaarutinik qulaajaaneq ajortut atorsinnaasaannik qitiusumit ataatsimoortukkuutaanik neqeroorteqarsinnaanissaq pingaarnertut anguniagaavoq. Tamanna isumassarsisitsinissamut kommuninullu ikiuinissamut periarfissatut ataatsimiititaliamit isigineqarpoq. Tamatumani eqqarsaatigineqarput isumaginninnermut peqqissutsimullu tunngasut. Ataatsimut isiginninnissaq aammalu innuttaasut kommunillu akornanni kiisalu illoqarfanni nunaqarfanni innuttaasut akornanni ataqatigiittoqarnera isiginiarneqaqqullugu peqqissuunissamik pinaveersaartitsinermillu suliniutit kikkunnut tamanut anngunneqartarnissaat pikkoriffiginerulertariaqarparput.

Peqqissutsimut tunngasut allanngoriartorfiusarput peqqinnissaqarfillu pisariaqartitanut ingerlaavartumik naleqqussartassaaq, parlattuanik pinnani. Utoqqaat amerliartorlutik inuiaqatigiit katitigaanerat allanngoriartorpoq, taamaattumillu nappaatit utoqqalinermik pissuteqartut amerliartussapput. Assersuutigalugu puigortunngortut amerlanerit aammalu sivilisuumik sulisimaneq pissutigalugu innuttaasut anniaatillit nungullarsimasullu sullinnissaat piareersimaffigissavarput. Tamanna inissianik nalinginnaasunik aammalu utoqqarnut inissianik sanaartornernut, iluarsaanernut il.il. immikkoortunut pilersaarutisani aamma takuneqarsinnaasariaqartooq ataatsimiititaliaq isumaqarpoq.

Isumaginninnermut tunngasut:

Isumaginninnermut tunngasuni siunnersuutit (aaqqissuusseqqinnissamik siunnersuutit) arlallit tamarmillu 2016-imi aningaasanut inatsisissatut siunnersuummut ukiunullu

missingersuusiorfiusunut aningaasaqarnikkut kinguneqaatillit Ilaqutariinnermut Peqqissutsimullu Ataatsimiititaliamit maanna suliarineqarput.

Ilaatigut utoqqalinersiaqarneq pillugu siunnersuut (UKA 2015/160), siusinaartumik pensionisiat pillugit siunnersuut (UKA 2015/98) aammalu ineqarnermut tapiissutit pillugit siunnersuut (UKA 2015/161), tamarmik 2016-imi aningaasanut inatsisissatut siunnersuummi konto pingaarnermi 20.11.51-imi, *Aaqqissuusseqqinnerit sunniutaannut* tunngasumi, taaneqartut ataatsimiititaliap suliarai. Siunnersuutit taaneqartut taama isikkoqartillugit akuerineqanngippata kinguartinneqarpataluunniit 2016-imi aningaasanut inatsisissatut siunnersuummut ukiunullu missingersuusiorfiusunut aningaasaqarnikkut annertuumik kinguneqarsinnaapput.

Isumaginninnermi ajornartorsiutit amerlasuut innuttaasunut inuiaqatigiinnullu annertuumik nanertuutaallutillu sunniutillit ataatsimiititaliamit aamma assut eqqumaffigineqarput. Tamatumunnga ilanngullugu meeqqat inuusuttullu suliami matumani pisinnaatitaaffii kiisalu ilaqutariit meerartallit suliniutigineqarnerat immikkut eqqaassallu immikkut tunngavissaqartoq ataatsimiititaliaq isumaqarpoq. Meeqqat inuusuttullu pisinnaatitaaffii atugassaritallu qulakkeerniarlugit nuna tamakkerlugu annertoorujussuarmik suli suliaasaqarpoq.

Aningaasat sulisussallu siunertaqarnerusumik qanoq atorneqarnissaat, tamatumalu saniatigut aningaasat nukissallu aammalu suliniutit pisariaqartut qulakkeerneqarnissaat pillugu ilisimasagut annertusarniarlugit Ilaqutariinnermut, Naligiissitaanermut Isumaginninnermullu Naalakkersuisoq, kommunit, soqutigisaqatigiiffiit allallu ataatsimiititaliamit oqaloqatigineqarput.

Pinaveersaartitsiniarluni suliniutit aammalu siusissukkat suliniuteqarnerup pingaaruteqarnerat:

Isumaginninnermut tunngasuni suliniutit toqqaannartut pinaveersaartitsiniarlunilu suliniutit suli pisariaqartippavut.

Suliasat pisariaqartut amerlassusiannut sanilliullugu isumaginninnermut tunngasuni sulisut amigaatigineqarput, soorlu peqqinnissaqarfimmi aamma taamaattoq.

Siusinnerusukkat oqaatigineqartut ataatimiititaliaq isumaqarpoq pinaveersaartitsiniarnerup katsorsaanerullu akornanni oqimaaqatigiissitsinissamut suli pikkorinnerulertariaqartugut. Pinaveersaartitsiniarnerup tunaartalersorneqarnissaanut, sunniuteqarnerulertinnissaanut pingaarnersiuiiffiginissaanullu pikkorinnerusariaqarpugut, taamaaliornikkut ajoqusernerit iluarsiniarlugit ingerlatat suliniutillu siunissami ikilisikkiartuaarneqarsinnaaqqullugit. Tamatumani isumaginninnermut peqqissutsimullu tunngasut eqqarsaatigineqarput.

Siusissukkat iliuseqartarnerup pinaveersaartitsiniarlunilu suliniuteqarnerup pingaaruteqarnerat naalakkersuineramik suliaqartunit paasisimasaqarluarfigineqarsorinarpoq. Taamaalillunilu ataatsimiititaliap nuannaarutigalugu paasivaa inuusaq atorlugu suliniut aalajangiusimaneqarmat immaqalu annertusarniarneqarmat. Tamanna ataatsimiititaliamit tapersersorneqarpoq.

Ilaqutariinnut sullissivinni neqeroorutit amerlanerunissaat – soorlu ilaqutariinnik isumasioqatiginerat – sulissutigineqartoq ataatsimiititaliamit maluginiarneqarpoq. Ilaqutariaat najugaqatigiiffinni inissianiluunniit nakkutigineqarlutik siunnersorneqarlutillu peqqinnarnerusumik inuuneqalernissaminnut aaqqissuussivigineqarnissamut periarfissaasa annertusarneqarnissaat ataatsimiititaliamit kissaatiginartinneqarpoq, taamaaliornikkut inuuniarnikkut kingornuttakkat siumut isigisumik unitsinneqarnissaannut peqataaqataasoqarluni.

Isumaginninnermut peqqissutsimullu tunngasuni siusissukku iliuuseqartarnermi pinaveersaartitsiniutitullu suliniutini siunertat sunniuteqarlutillu anguneqarpata inunnut ataasiakkaanut inuiaqatigiinnullu iluaqutissanik pisariaqartinneqartunik pissarsiviussapput.

Pisariaqartitsineq naapertorlugu periutsit suliniutillu nutaanngorsarnissaat naleqqussarnissaallu Naalakkersuisunit taamatullu Inatsisartunit ammaffigineqartariaqarpoq. Minnerunngitsumik anguniakkagut angusinnaanngikkivut paasinarsigaangat imaluunniit ajornartorsiutit naatsorsuutigisanit annertunerugaangata iluarsivigineqanngilluinnaraangataluunniit.

Aaqqissuussaaniikkut qisuariartaatsit, tassalu ingerlatsiveqarfiit, aqutsisoqarfiit oqartussaasullu allat periutsinut suliniutinullu ingerlareersunut naleqqussaaniissaminnut nutaanngorsaaniissaminnullu kajumissuseqanngissinnaanerit toqqammaviginaveersaas-savarput.

Siusinnerusukku saqqummiunneqartutut ataatsimiititaliamit siunnersuutigineqassaaq isumaginninnermut tunngasuni nakkutilliineq kontomi pingaarnermi nutaami ilanngunneqassasoq, taamaaliornikkut tamanna ersarissarneqarlunilu pingaarnersiorneqaaqqullugu.

Immikkoortumut pilersaarutit siunissamilu pisariaqartitat:

Ulloq unnuarlu paaqqinniffinnut, utoqqarnut innarluutilinnullu immikkoortumut pilersaarutit ataatsimiititaliap ugartorsimavai, taakkumi 2015-imi nuna tamakkerlugu pilersaarut pillugu nassuiaammi suli amigaataammata. Immikkoortumut pilersaarutitik suliaqarnissaq siunertaralugu utoqqarnut tunngasuni piareersaataasunik suliaqartoqartoq aammalu tamanna kommunit qanimut suleqatigalugit ingerlanneqartoq ataatsimiititaliamit maluginiarneqarpoq.

Taamaattumillu utoqqarnik isumassuinnermi siunissaq ungasinnerusoq isigalugu inuiaqatigiit katitigaanerisa allanngoriartorneranut aamma naleqqussaasoqartariaqassaaq. Matumani eqqarsaatigaagut illutat aammali minnerunngitsumik sulisoqarneq, utoqqarnik isumassuinnermi siunissami pisariaqartitanut annertussutsikkut pitsaassutsikkullu aamma naleqqussarneqartussa.

Meeqqanut inuusuttunullu kiisalu innarluutilinnut ulloq unnuarlu paaqqinniffinnut tunngasuni immikkoortumut pilersaarut, qaninnerusoq ungasinnerusorlu eqqarsaatigalugit psiariaqartitanik qulaajaataasussa qiaartumik aallartinneqassasoq ataatsimiititaliap maluginiarpa.

Suliaq pingaartinneqarmat ataatsimiititaliamit iluarisimaarneqarpoq, inerneralu pillugu ilisimatinneqarnissaq qilanaarineqarluni.

Inuusuttunik sulilersitsiniarneq suliffeqarnerlu inissaqartitsisoq:

Inuusuttortatta atuarfimmi naammassinermik kingorna sapinngisamik annertunerpaamik ilinniartitaanermi ingerlaqqinnerisa sulilernerisaluunniit inuiaqatigiinnut iluanaarutissartaat pingaarutaallu Aningaasaqarnermut Ataatsimiititaliamit Naalackersuisunillu assut eqqumaffigineqaqqullugit ataatsimiititaliamit kaammattorneqarput. Aammattaaq siusissukkut iliuseqartarnerup, nuna tamakkerlugu meeqqanut inuusuttunullu ikorfartuutinik amigaateqarnerup aammalu ilinniartitaanernik taamaatitsiinnartarnerup akornanni ataqatigiittoqarsinnaanera tikkuassallugu ataatsimiititaliap pisariaqarsoraa. Inuusuttut taama amerlatigisut ilinniagaqannginnerat aammalu "eqimmattat sinneruttut" taama amerlatiginnerat ataatsimiititaliamit assorsuaq ernummatigineqarpoq.

Inuiaqatigiinnik nutaaliaalluinnartunik ingerlatsinissatsinnut innuttakitsunnguuvugut, taamaattumillu inuiaqatigiit ineriartornerannut ingerlanneqarnerannullu peqataaqataasinnaanissap inuusuttunnguunermili qulakkeerneqarnissaa pingaaruteqarluinnarpoq. Pitsaanerpaamik ineriartornissamut, taamaalillunilu inuiaqatigiit ineriartornerannut tapeeqataasinnaanissamut inuussuttut tamarmik periarfissaqartinneqarnissaat naalackersuinikkut qulakkeerneqassasooq ataatsimiititaliamit kissaatigineqarpoq.

Suliffeqarneq pisariaqartitanik ineriartortitsiviusooq akuulersitsisorlu kiisalu siusinaartumik pensionisialinnut kiisalu innarluutilinnut ineriartornermikkullu kinguarsimasunut siusinaartumik pensionisiaqartuusariaqanngitsunut sulilernissamik pisariaqartitsisinnaasunut inissaqartitsisoq pilersissavarput. Nikerartumik oqitsumillu suliffinnik pilersitsisoqassaaq pisariaqartitsinerlu malillugu ineriartortitsisoqassalluni. Pisortanit pilersorneqarnissamut taarsiullugu imminut pilersornerunissaq naalackersuinikkut anguniagaavoq.

Isumaginninnermut peqqissutsimullu tunngasuni sulisut suli piginnaanngorsarneqarnissaat qulakkeerneqassaaq, taamaaliornikkut taakku maanna siunissamilu suliassanik kivitsisinnaaqqullugit.

Inatsisit imminnut ataqatigiinneranni ajornartorsiutit


Isumaginninnermut tunngasuni inatsisit arlallit taakkulu suliffeqarnermut ataqatigiinnerannut tunngasumik ajornartorsiuteqartoq ataatsimiititaliamit aamma eqqumaffigineqarpoq.

Sulinerup imminut akilersinnaanissaa sapinngisamillu annertunerpaamik imminut pilersornissaq aalajangiusimaneqassapput. Akuersaarneqarsinnaanngilarmi suliffeqarnermit pisortanit pilersorneqarnissaq arlalitsigut ilorrisimaarnarnerummat imaluunniit aningaasaqarnikkut orniginarnerummat.

Taama anguniagaqarnerup attatiinnarnissaa qulakkeerniarlugu Naalackersuisut Inatsisartullu ataatsimut suliassaqarput.

Inuiaqatigiit peqqissumik ineriartussappata innuttaasut peqqissut pisariaqarput, taamaattumillu suliassaqarfinni aningaasat pingaarnersiorneqartut taakkulu atugassiissutigineqarnerat aalajangiisuusumik pingaaruteqarlutik.

Ilaqutariinnermut Peqqissutsimullu Ataatsimiititaliaq


Tillie Martinussen
Ataatsimiititaliap sulittaasua

Assilinera ukununga:

Ilaqutariinnermut, Naligiissitaanermut Isumaginninnermullu Naalakkersuisoq aamma Peqqissutsimut Naalakkersuisoq.